

Q. D. B. V.

DISSERTATIO PHYSICA
DE

TVBVLLIS
CAPILLARIBVS,

QVAM

SVB DIVINIS AVSPICIIS,
AMPLISSIMAE FACVLTATIS PHILOSOPHICAE
AVCTORITATE,

PRAESIDE

GEORGIO WOLFFGANGO
KRAFFTIO,

PHILOSOPHIAE MAGISTRO,
VNIVERSITATIS, ET COLLEGII ILLVSTRIS, PHYSICES ET
MATHESEOS PROF. PVBL. ORD.
IMPERIALIS PETROPOLITANAE, ET REGIAE BEROLINENSIS,
ACADEMIARVM SCIENTIARVM MEMBRO
HONORARIO,

CONTVBERNII ACADEMICI RECTORE,
IN ALMAE VNIVERSITATIS TVBINGENSIS
AVDITORIO PHILOSOPH. AESTIVO,
PRO CONSEQVENDIS LEGITIME MAGISTERII
PHILOSOPHICI HONORIBVS,
PVBLICE OPPONENTIVM DISQVISITIONI SVBIICIT,
DIE XXVIII AVGVSTI MDCCXLVIII,
RESPONDENS

IOH. MICHAEL BÜRCKH, Sulzenfis,
PHILOSOPHIAE CANDIDATVS.

TVBINGAE, LITTERIS ERHARDTIANIS.





§. I.

imul atque, elegantia sua se commen-
dans, illa œconomia canaliculorum
vitreorum angustissimorum, qui capil-
lares dicuntur, speculatoribus venato-
ribusque naturæ fuit patefacta: eorum
quam primum etiam in ipso aditu, &
ianua quasi, contemplatio cognitioque variis crevit & studiis,
& varia sedulitate. Primus memorabilis huius experimenti
inuentor legitur esse Dom. Rho, in *Journal des Savans* ad an-
num 1666, pag. 613, & in *Sturmii Collegio experimentalis*, P. I,
Auctarii ad VIII Tentam. p. m. 77, edit. 1701. Cuius vero
nominis nulli inter eruditos innotuerunt, nisi duo fratres,
Johannes, & *Jacobus*, Rho, siue *Raudenses* dicti; quorum ille,
studiis Theologicis vnice addictus, nihil ad nostrum thema
spectans memoriæ mandatum reliquit; hic vero egregius Ma-
thematicus fuit, ac ad Sinenses missionarius factus, inter hos
Astronomiam præcipue excoluit; quod testantur sub his no-
minibus *Lexica*, *Eruditorum Lipsiense*; nec non *Historicum*
Basiliense; atque huius mentionem facit quoque Clariss. Dom.
Heilbronnerus, in *Historia Matheseos vniuersæ*, pag. 530, lib. I,
cap. 28. Verum enim vero cum neuter horum superauerit

viuendo celebrem illum *Blasium Pascalium*, qui de liquorum
 æquilibrio multa & meditatus est, atque edidit, præclara in-
 venta, hanc autem tubulorum capillarum proprietatem plane
 ignorauit adhuc; de quo vid. *Sturmii* l. c. pag. 78: sequitur
 sane, neutri illorum hanc attribuendam esse laudem. Nihil
 igitur superest, quam vt gloriam huius reperti concedamus
Jacobo Robault, celeberrimo Parisiensium Physico, & magni
Cartesii æscholæ, cuius omnes illius temporis auctores Physici
 laudant atque celebrant admirandam excogitandorum & de-
 clarandorum experimentorum habilitatem; & qui in eximia,
 quam & docuit, & scriptam edidit, *Physica*, circa medium
 seculi proxime superioris primum edita, primus, quantum
 hucusque reperire potui, phænomeni, de quo agere institui-
 mus, mentionem facit, P. I, cap. 22, §. 88, hisce verbis, a
 Cel. Sam. Clarkio Latine redditus: “*Si ad exteriorem tubuli mi-*
nuti, mundi, utrinque aperti, & in manu ad perpendiculum ere-
cti, superficiem guttulam aquæ admoueris, quæ ad extremum tu-
bulum delapsa foramen inferius plane occludere possit: tubulum
perinde repletum iri, ac si in aquammersus esset, voluptate perfu-
sus videbis. Facile nimirum accidere potuit, vt scriptor dia-
 rii eruditorum l. c. deceptus nomine fuerit, putaueritque *Rho-*
 illum esse, qui vera appellatione *Robault* dicendus erat; ne-
 que obstat, quod *Honoratus Fabri Scient. Phys. Tract. V, lib. 2,*
in Digress. I, ad-propos. 225, dicat, experimentum hoc Floren-
 tiæ primum probatum fuisse; probare enim non est inuenire con-
 filio, aut casu reperire; cum præsertim etiam *Boyleus*, qui pri-
 mam experimenti huius cognitionem Angliæ suæ intulit, a
 nostra sententia non sit alienus, in *Novis Experimentis Physico-*
Mechanicis, Exp. 35, p. m. 235, quæ in forma epistolæ scripta
 sunt, d. d. 20 Dec. 1659, his verbis: “*Insignis quidam Mathe-*
maticus aliquando mihi narrauerat, curiosos aliquos e Gallia vi-
ros, quorum nomina me iam latent, obseruasse, quod, si alterum
exilis & perforati tubi vitrei extremum aquæ immergatur, liquor
ad aliquam in tubo altitudinem conscendat, etiamsi perpendicula-
riter ad planam aquæ superficiem suspendatur. Quibus omni-
 bus accedit adhuc, ipsum *Robaultium* in *Tractatu Scientiæ Me-*
chanicæ, scholio ult. dicere, inæqualitatem ascensus in tubo
 com-

communicante inæqualium crurum a nemine hucusque, præter se, fuisse animaduersam.

§. II. Hoc itaque nobilissimum fere Physicæ hodiernæ inventum experitur idem fatum, quod nuper admodum accidere diximus, in Dissertatione de *Phialis vitreis, ab injecto sili- ce dissilientibus*, §. II, phialis Italicis æque ac Hollandicis guttis. Vix enim vnquam de inuentore, aut tempore inuentio- nis, quicquam certi asseuerare licet eo modo, quo hoc fieri optamus. Anne indicio id est, nunquam vnum quenquam quicquam recte inuenire? an incuria auctorum, inuenta sua sæpe aut nescientium, aut negligentium, in caussa est? an quid aliud? an de magna aliqua inuentione dici potest, quod *Virgilius* Æn. IV, v. 173, de fama cecinit? extemplo magnas it per vrbes, *bonum*, quo non aliud velocius vllum, mobili- tate viget, viresque acquirit eundo, parua metu primo, mox sese attollit in auras, ingrediturque solo, *sed caput inter nu- bila condit*; tam ficti prauique tenax, quam nuncia veri. Id certe accidit in hoc negotio, vt vires inuentio acquisiuerit eundo. Ita enim ab ætate nouitia & iuuenili, quam præ se adhucdum fert, sua exulta illa est atque locupletata; ita fol- libus partim ac incudibus, partim vero hamis ac vncis, do- tata est & instructa; vt, si diuersas hasce dotes ipsius, ex vtroque cultu acquisitas, contuearis: ab vna appareat artis ornatu superbiens, ab altera autem naturæ nutu pelliciens. Cum autem vtramque hanc nos admiramur, nihilque diuitia- rum in vna aut altera desiderare nunc quidem possumus: in- stituti nostri ratio eo tendit, vt post Celeberrimorum Viro- rum labores hac in re non exiguos, ac ab omni ætate laudan- dos, afferamus quædam, quæ Exercitationi huic Academicæ iucunde & vtiliter instituendæ possint inseruire; neque tamen in singulis iam trita & peruagata apparere. Quis enim multa noua excogitanda sibi promittet in re, quæ tanta, tamque diuina, exercuit ingenia Physicorum, quos breuiter indica- bo, & quorum sola nomina sunt Ipsorum præconia. Videas igitur pro arce tenuis nostri huius posticuli *Jac. Robaltium*, in *Physicæ*, P. I, cap. 22, §. 88. *Rob. Boyleum*, in *Nouis Experi- mentis Physico-Mechanicis*, Experim. XXXV. *Sturmium* in Col-
A 3 legio

legio Experimentalis, P. I, *Tentam.* VIII, atque in huic adiecto *Auctario*. Celeberr. *Jurinum*, in *Dissertationum Physico-Mathem.* Dissert. I, II, & III. Perillustrem atque Excellentissimum Dom. *Bilfingerum*, in *Dissertatione Experimentalis de tubulis capillaribus*, inserta *Commentariorum Academiae Scientiarum Imperialis Petropolitanae* Tomo II, pag. 233. Celeberr. *Petrum van Musschenbræck*, in *Dissertatione de tubulis capillaribus vitreis*, inserta *Dissertationibus eiusdem Physicis Experimentalibus & Geometricis*.

I. §. III. Quoniam in duobus tubulis capillaribus altitudines, ad quas fluida eadem attolluntur in illis, sunt in ratione inversa diametrorum, quas tenent illi tubuli; in quo phænomeno consentiunt omnes, qui de his canaliculis experimenta ceperunt: sequitur exinde pulcherrimum hoc *Theorema*, esse in his tubulis omnibus, quotquot eorum dari possunt, superficiem cylindricam fluidi, vitro adhærentis, eiusdem ubique, & constantis, magnitudinis. Sint enim instar omnium duo tales tubuli BAC, DEF, aquæ admoti orificiis suis inferioribus, quorum diametri sint AB & DE; altitudines vero aquæ suspensæ AC & EF; atque ponatur ratio diametri ad peripheriam esse $1 : \pi$; erit tum tubuli BAC peripheria $= \pi. AB$; atque superficies interna aquæ adhærentis $= \pi. AB. AC$; tubuli vero DEF erit peripheria $= \pi. DE$, & superficies interna aquæ adhærentis $= \pi. DE. EF$; cum vero, ex modo dictis, sit $AC : EF = DE : AB$; aut vero, ductis in se extremis & mediis terminis huius proportionis, $AB. AC = DE. EF$; erit etiam $\pi. AB. AC = \pi. DE. EF$; hoc est, superficies interna aquæ, adhærentis in tubulo priori, æqualis est superficiei internæ, aquæ adhærentis in tubulo altero. Vnde constat propositum, cum simile ratiocinium sit in omnibus reliquis eiusmodi tubulis; quod etiam Celeberr. *Jurinus* asseveravit in *Dissert. cit.* pag. 4; quantitatem nempe superficiei, qua aqua continetur, in omni tubo esse datam; hoc est, pro eodem fluido eiusdem & constantis ubique magnitudinis.

§. IV. In hanc igitur constantem magnitudinem inquisui satis solícite, modo nempe sequenti. Sumsi tubulum vitreum, recentem, cylindricum, vtrinque apertum, cuius longitudo erat

erat circiter quatuor pollicum, diameter autem aperturæ 7 partium millesimarum pedis Rhenani, siue 7 scrupulorum. Admota huic tubulo, verticaliter exacte posito, copia aliqua spiritus vini vulgaris, expansa super vitrum planum, inueni repetitis vicibus, ascendere hunc ad altitudinem 17 scrupulorum. Posita ergo ratione diametri ad peripheriam vti 100 ad 314, erit superficies huius spiritus, interne vitro adhærentis, $373\frac{3}{5}$ scrupulorum quadratorum; vel, hæc superficies constans & eadem in quocunque tubo capillari, orta ex ascensu spiritus vini, erit æqualis quadrato, cuius latus est $19\frac{33}{100}$ scrupulorum pedis Rhenani. Venit ex hac occasione mihi in mentem iam ante complures annos, annon fortasse hinc derivare liceret methodum inueniendæ mensuræ vniuersalis; hoc est talis, quam quilibet per se inuenire & exhibere posset, sine communicatione ab alio quodam facta; & quam, deperditam inter omnes gentes, solo aliquo experimento restituere liceret. Quæ quamuis a multis hucusque diuersa opera quæsitæ fuit: haud incommode tamen per tubulos etiam capillares, debitæ adhibitis cautionibus forsan obtineri posset. Obseruet enim, quicumque cupiat habere longitudinem scrupuli Rhenani, altitudinem capillarem tubi vitrei bene constituti, vti modo diximus, in spiritu vini vulgaris, quem vbiuis fere terrarum, atque eiusdem proxime qualitatis, sibi comparare quilibet potest; deinde ex capta diametro formet rectangulum æquale illi, quod tenet in sua superficie cylindrus adhærentis huius spiritus vini in tubulo, & hoc rectangulum, per præcepta Geometriæ, mutet in quadratum; quod, si obtinuerit, diuidat huius latus quodlibet in partes $19\frac{33}{100}$ æquales; atque erit talis pars integra quælibet eiusdem longitudinis cum parte millesima pedis Rhenani, quæ adeo millies deinde sumpta pedem hunc ipsum adæquabit.

§. V. Ingenii vero potius, quam serii vsus, gratia hæc adduximus. Ad quod idem referendæ etiam sunt aliæ mensuræ vniuersales, quales sunt *Hugenii*, qui pendulum simplex singula minuta secunda oscillans; *Leutmanni*, qui Barometri altitudinem mediam; *Spinneri*, qui distantiam pupillarum oculorum nostrorum, in omnibus hominibus adultis plane æqualem,

lem, vt putabat, & eandem, pro mensura vniuersali assumi posse crediderunt. Vid. huius Dissertatio, *de noua mensura corporum vniuersali*; Wittebergæ edita anno 1727. Quarum omnium *Hugeniana* methodus optima est & certissima, in eodem nempe aliquo climate, vel in diuersis etiam, vbi de diuersa penduli simplicis longitudine in diuersis climatibus perfecte res fuerit explorata. Verum eadem quoque est factu difficillima. Incertissima autem, & omnium minime adhuc comprobata, est sententia *Kochanskii*, qui in *Actis Eruditorum Lips.* ad annum 1687, m. Maio, distantias plumularum in penna passeris huc referri cupiebat; quoniam has arbitrabatur esse æquales omnes, hocque auicularum genus vbique reperiri; dum *Dapperus* in descriptione Africæ passeris quoque apud Caput bonæ spei inueniri dicat.

§. VI. Aliud *Theorema*, quod primus, quantum scio, ego obseruari, atque in *Experimentorum Physicorum præcipuorum descriptione*, Petropoli anno 1738 edita, pag. 57 publicaui, hoc est. *II.* Aquæ suspensæ in tubulo capillari, extra vasculum repletum extracto, verticali aut inclinato, BAC admoueatur alius tubulus gracilior DE, atque huius orificium superius D leuiter inferatur aquæ ibi suspensæ: tum vero aqua CAB, quæ modo ante quæta hærebat in tubulo superiori, illico omnis effluet ex illo ampliori in hunc angustiores, atque ex hoc delabatur tamdiu, donec tantum aquæ suspensum maneat in hoc inferiori, quantum ipsius angustiae debetur. Eius vero longitudinis assumendus est tubulus inferior, vt omnem aquam in CAB contentam capere possit; aliter non omnis effluet ex tubo superiori in hunc, sed tantum modo, quantum sufficit ad implendum tubulum graciliorem; qui si inferne, apud E, hermetice fuerit sigillatus, nihil plane aquæ in se recipiet; neque huius aquæ quicquam defluet ad latera tubuli minoris, si superne apud D fuerit hermetice occlusus. Egregium vsum habet hæc observatio, si vacuefaciendi sint tubuli exigui fluido repleti; ore enim exsucti illi ab impuritatibus saluæ, atque aliis spiritus inquinamenti, tuti conseruari vix possunt; hoc autem medio exinaniti purissimi manent, aliisque postea subsequentibus experimentis sine vilo periculo possunt admoueri.

§. VII.

§. VII. Vasis cylindricis amplis, aqua plenis, angustiores tubos immerfit quidem iam *Sturmius*, in *Collegii Curiosi* Tentam. VIII, phæn. 7; sed longe alio modo & instituto. Aqua enim ipsi in laxioribus stagnabat, nec suspensa hærebat; quibus superne dein angustiores immisit; non vero minores inseruit aquæ in amplioribus hærenti & suspensæ; tum vero Vir diligentissimus consideravit altitudinem aquæ in ea cavitare, quæ ab utroque tubulo esset residua, eamque comparavit cum altitudine, in qua tubulus minor aquam teneret suspensam; quæ omnia in nostro experimento longe se habent aliter. Ut igitur redeam ad experimentum hoc nostrum, non diffiteor, illud ab initio mihi visum fuisse confirmare explicationem *pressionis*, nec admittere enodationem ab *attractione* petitam. Admoueatur enim aquæ suspensæ CAB tubulus gracilior ED; atque confestim duæ conspicuæ sunt pressiones, multum inter se diuersæ. Premitur enim aquæ superficies CF deorsum æthere, vel ære, spatium ab aqua non occupatum replente, & pro maiori amplitudine huius spatii, minus impedito: huic pressioni deorsum nitenti directe sursum renititur pressio eiusdem ætheris per orificium E ingressi, sed, ob maiorem angustiam tubi ED magis impediti; diaphragma autem annulare aqueum, ambiens circa D tubulum minorem, premitur æthere plane libero; quid igitur mirum esse poterit? pressionem fortiorem vincere debiliorem: aquamque CFB in tubum angustiozem detrudere; efficereque ut integra in hunc intret; atque, si maior aquæ copia sit, quam ut hic omnem eam ferre possit, reliquum guttatim effluat ex E. Sit enim cavitare DE non capax omnis aquæ in CB contentæ: effluet aqua nihilo minus in tubum graciliorem, pressione fortiore coacta; sed simulac eius pars anterior subintrat orificium E, exitura exinde, tum retroagitur pressione libera ætheris externi, maiori quam quæ agit supra CF, quæ non est libera sed coërcita; nisi itaque pondus voluminis huius aquosi superet hanc pressionem: nihil aquæ poterit elabi.

§. VIII. Utut vero speciosa sit explicatio præcedens: multa tamen in ea possunt, & iure quidem, desiderari, quæ, a Celeberrimis Viris admonitus, lubens tandem agnoui atque perspexi.

Pressionem impeditam, debiliorem libera, ætheris pertingentis in vasa angusta, assumerunt *Sturmius & Jacobus Bernoullius*; dubium vero est, an admitti possit hoc pressionis æthereæ discrimen in fluido, quod supra omnem imaginationem ac fidem subtile esse dicitur; dubium est, an in mundo existat ullus æther, cuius quippe existentiam *hypothetice* ponimus, non autem *dogmatice* euincimus aut ratiocinando, aut experiendo, aut observando. Multo itaque certius, & maiori fiducia, & minori erroris periculo, phænomenum hoc nostrum annumeramus attractionum classi; atque adeo illi enodando & exponendo attractionis leges, tanquam faciem aliquam, præferimus, cuius igne illud *optice* illustramus tantum, minime vero resolvimus *chemice*. Constat enim innumeris aliis experimentis, aquam fortius attrahi a vitro, quam ipsa attrahitur ad se. Hinc itaque, immisso in aquam suspensam CAB tubulo minore D, ab hoc orificio magis attrahitur aqua vicina, quam ipsa cohæret in se. Sequitur illa igitur hunc ductum, & ipsa a se separatur, influitque in tubuli minoris orificium D; hocque ita similiter peragitur eo usque, dum vltima influat gutta; quæ abripitur quidem, minoris tubuli attractione, a maiori peripheria, quam quæ est attrahentis; minime vero a maiori superficie; superficies enim occupatæ ab aqua, ex actione virtutis capillaris, constantis & eiusdem inter se sunt magnitudinis omnes; (§. III.) Vt taceam, vltimam hanc guttulam orificium D intrare eo certius & facilius, quo magis illa non a vitro D tantum, sed ab aqua quoque iam antegressa, simul attrahitur. Si vero quæras, cur non ad latera tubuli DE exteriora defluat aqua, sed ad solam se recipiat interiorē cavitatem, cum ab vtraque hac attrahatur superficie: respondemus, id ob hoc fieri, quoniam aqua in cavitatem intrans, præter vitri attractionem, magis ipsa a se iuuatur, mutua & vicina sua ipsius attractione, quam si deflueret ad latera externa, in quibus mutua aquæ ipsius attractio interrumpitur, dum coire aqua ibi potest, hic vero non. Sit iam tubus DE clausus hermetice in D; atque vix differet hoc casu tubulus DE a cylindro vitreo solido, cuius externa tantum superficies attractionem in aquam exercet; igitur omnis aqua inter A & D intercepta pari vi trahetur tam ad A quam ad D; vnde
nullus

nullus fieri poterit effluxus. Quod si vero inferius extremum E hermetice sit sigillatum: tum certe nihil aquæ influet in tubulum minorem ob resistantiam æris ibi contenti; qui, si in vacuo *Guerickiano* auferatur: tum vero illapsura est aqua ex tubo ampliori in hanc cauitatem tenuiorem.

§. IX. In eodem porro hoc phænomeno nostro quantitas aquæ effluentis, & guttatim delabentis ex tubo angustiori, proportionalis erit differentiæ diametrorum, quas tenent tubuli. Ponantur enim in tubulo maiori diameter $= D$, altitudo capillaris, ad quam nempe aquas tenet suspensas, $= A$, in minori vero tubulo eadem respectiue sint d , & a ; quantitas igitur aquæ, quam continet maior, est $= D^2 A$; in minori autem eadem est $= d^2 a$. Est autem (§. III,) $D : d = a : A$, hoc est, $DA = da$; quod substitutum efficit quantitatem aquæ effluentis $= D^2 A - dDA = DA (D - d)$; sed DA est constans quantitas; ergo quantitas aquæ effluentis, & guttatim ex angustiori tubulo delabentis, erit proportionalis ipsi $D - d$, hoc est, differentiæ diametrorum, quas habent tubuli.

§. X. Si de causa aquæ in tubulo capillari suspensæ quæras: inprimis notandum est, æris nullum hic esse munus. Monet enim *Boyleus*, atque monent post illum vniuersi Scriptores Physici, quod facillime etiam hodie videri potest, aquam in tubulo capillari suspensam ad eandem quoque altitudinem hærere, etiam si in loculo ab ære vacuo collocetur. Neque vllius momenti est si obiicias, non fieri posse, vt obtineamus spatium aliquod ab omni ære vacuum, adeoque prouocare ad hoc minime licere. Quamuis enim non sit in potestate nostra positum, efficere spatium vacuefactum ab ære omni numero absolutum: est tamen in viribus nostris situm producere tale, quod ad vere vacuefactum accedat quam proxime. Hic itaque ær maxime attenuatus, si non ad nullam, ad minimam certe altitudinem eleuatam tenere deberet aquam, si ab ipsius pressione eleuatio hæc esset deriuanda; quod vero non fit. Actum igitur hic est de æris aduocanda pressione, atque conclamatum. Cum itaque nec folles, nec incudes, *Aristotelis* iuuare nos hic possunt: confugiamus certe ad vncos atque hamos *Democriti*, non secus ac ad equos claudi. Factum hoc etiam est; sed ita,

vt, ob summam explicationis difficultatem, in triplicem se viam separauerint antiquæ huius Philosophiæ renouatores. Cum enim aquam ad se, incognito naturæ instinctu, allicit atque trahit interior tubuli superficies: tripliciter id fieri potest. Aquam enim in tali tubulo suspensam attrahit atque sustentat aut 1, tota tubuli, supereminens etiam, interna superficies; aut 2, illa superficies sola, quæ aquæ suspensæ est contigua; aut denique 3, huius solus annulus supremus. Harum sententiarum quælibet celebrem nacta est defensorem; quorum argumenta videamus.

§. XI. Aquas, cupiditati tenuis alicuius canaliculi expositas, ab integra sursum extensa ipsius interna cuticula introrsum rapi, statuit Celeberr. Dom. *Muschenbroekius*, l. c. pag. 287. Sed peroptamus, vt sequentem nobis hic eximat scrupulum Vir naturæ scientissimus. Videtur enim deduci ex hac sententia, legitimo nexu, talis altitudo fluidi suspensi, quæ factò ipsi, & euentibus, minus respondet. Nam ponamus tubuli diametrum $= D$, longitudinem ipsius integram, extra aquas in vasculo stagnantes prominentem $= L$, atque altitudinem, ad quam supra libellam aquas eleuat, $= A$; eritque sic pondus aquæ intra tubum suspensæ in ratione ipsius $D^2 A$. In eodem porro tubulo, ex hac sententia, erit vis attractionis proportionalis toti superficiei internæ, cuius quantitas proportionalis est ipsi DL . Cum itaque superficies tota attrahens ex eo solo cöerceatur, quando pondus suspensum sustentat viribus suis æquale, vt æquilibrium exinde nascatur; aut, quia vis illa, quæ eleuat aquam, æqualis est illi, quæ postea sustentat eandem; cum durante eleuatione præualet, in sustentatione autem, eadem adhuc, quæ prius, a solo pondere aquæ suspensæ ad æquilibrium redigitur: poni nunc debet $D^2 A = DL$, vnde consequitur esse $A = \frac{L}{D}$; siue altitudinem capillarem cuiusque tubi esse in ratione directâ longitudinis, atque inuersa diametri eiusdem; quod, qua ratione ostendant experimenta, perspicere nunquam potui. Exempli gratia adducemus obseruationem Ipsius Celeberr. *Muschenbroekii*, qui lib. cit. pag. 285, asserit, tubulum diametri $\frac{1}{32}$ poll. longitudinis vero $3\frac{1}{2}$ poll. aquam in se rapuisse ad 20 lin. Alium vero diametri $\frac{1}{6}$ lin. longi-

longitudinis $7\frac{1}{2}$ poll. aquam attraxisse ad 55 lin. quibus ita existentibus deberet esse $20:55. = \frac{3\frac{1}{2}}{\frac{1}{38}} : \frac{7\frac{1}{2}}{\frac{1}{72}} = 7:30$; qui autem quatuor numeri a proportionē Geometrica multum abhorrent. Quæ vero cum hic profero, id certe summa cum veneratione, erga Virum de genuina Physica Meritissimum facio; atque, si fieri id potest, meliora doceri ab Ipso quam maxime cupio.

§. XII. Faueret huic sententiæ phænomenum, quo longiores tubi vitrei ad maiorem quoque altitudinem aquas in se rapiunt; si modo id dubium non esset, sed pro vero atque concessio assumi tuto posset. Quod certe hucusque facere non licet; cum & experimenta *Carreana* doceant longitudinem tubi ad aquæ altitudinem nihil conferre; atque acrius etiam contra hanc sententiam disputauerit b. *Weitbrechtus*, *Commentar. Petropol.* Tomo IX, pag. 284, §. 13. Ego quoque ita ratiocinatus sum, vt putarem liquores a tubulo capillari haustos deprimi debere, si longitudo tota tubi causa huius haustus fuerit, atque ab illo notabilis pars quædam superne abscindatur. Cessante enim causa: cessare effectum necesse est. Igitur aliquando ad asserem læuigatum, & verticaliter erectum, alligavi tubulum capillarem, cuius longitudo erat 78 poll. diameter vero $\frac{1}{8}$ poll. duodec. Londinens. immersum paullisper calici aqua repleto; post tres, aut plures, horas hic tubulus visus est omnino arripuisse aquas ad altitudinem completam, nempe $\frac{7}{8}$ poll. Tum vero, abscissa superne aliqua portione tubi, reduxi eum ad pollices 24, & nunc quidem post quinque horas ne hilum quidem depressiorem aquæ contentæ superficiem inueni. Postea abscindendo denuo portionem aliquam, atque sic reducendo tubulum ad pollices modo septem, post duodecim horas eandem præcise adhuc deprehendi aquæ eleuatæ altitudinem. Sed prætereo multa a me instituta tentamina alia, quibus semper ad id inductus fui, vt crederem, nihil longitudinem tubi conferre posse ad liquoris in illum attracti altitudinem.

§. XIII. Secundo iam sustineat aquas, in tubulum allectas, illa sola superficies vitri, quæ eisdem est contigua; vti *Hauksbeii* quondam sententia ferebat. At vero minime omnium hoc ita




peragi posse facili demonstratione euincitur. Vidimus supra, (§. III,) superficiem vitri, ab aqua in tubo aliquo occupatam, in omnibus tubulis esse perpetuam, eandem, atque constantem. Illam igitur designabimus per S. Hæc S sustentat ergo in tubulo g. I. maiori pondus aquæ $\equiv AB^2 \cdot AC$; in minori autem pondus $\equiv DE^2 \cdot EF$; quæ duo pondera sunt inter se vti AB ad DE, hoc est, vti diametri tubulorum, ob $AC : EF \equiv DE : AB$. Hinc sequitur ex hac sententia, eandem causam S sustentare in tubulo maiori pondus maius, vti AB; in minori autem canaliculo pondus minus, vti DE; æquales itaque causas generare effectus inæquales; quod plane fieri non potest, sed est absurdum; idque eo magis, quod vis sustentans, simul omnis sumta, fauorabilius applicata est in tubis angustioribus; quoniam scilicet minor est particularum liquoris mediarum distantia a parietibus, a quorum attractione iuuantur. Vid. Perillustis Dom. *Bilfingeri* Dissertatio cit. pag. 278, §. 45; nec non Celeberr. *Iurini* Dissert. alleg. pag. 4.

§. XIV. Tertio iam suspensam in tubulo aquam sustentet solus annulus vitri supremus, exigua quidem, sed aliqua tamen, altitudine donatus. Hæc mens est Celeberr. Dom. *Iurini*, exposita in Dissert. cit. pag. 5, vbi dicitur: „*Seposita igitur hac hypothesis (Hauksbeiana nimirum,) accedo iam ad veram causam huius phænomeni exponendam. Hæc autem est attractio peripheriæ, seu sectionis annularis tenuissimæ, superficiæ concavæ tubi, cui contigua est & cohæret summa aquæ suspensæ superficiæ.*„ Sit igitur, ex mente Celeberr. huius Auctoris, tubuli alicuius diameter $\equiv D$, altitudo aquæ suspensæ $\equiv A$, altitudo annuli sustentantis indefinite exigua $\equiv e$, sed in eodem tubo constans hæc, & sibi semper æqualis. Erunt itaque, vis sustentans $\equiv De$, & pondus fluidi sustentatum $\equiv D^2 A$; vnde efficitur $A \equiv \frac{e}{D}$. Si igitur quantitas e, altitudo nempe annuli sustentantis, hoc est, sphæra attractionis in vitro, constans sit, & eadem in omnibus vitri generibus, vel quantitas ubique constans: tum altitudo capillaris erit in ratione inuersa diametrorum tubulorum capillarium *sine vlla exceptione*; si vero quantitas e in diuersis tubulis sit aliquantum variabilis, quod ex diuersa vitri natura fieri facile potest: eadem dicta modo hæc proprietas vera erit *cum aliqua exceptione*.

§. XV. Liceat vero nobis hic audere aliquid, atque tentare tantum, non autem penitus conficere, an modo dicta hæc *Iurimiana* sententia ex primis motuum regulis deriuari possit; aut an aditum saltem aliquem illi ad has aperire sit concessum. Constat hodie inter omnes Physicæ cultores, positis massa alicuius corporis $= m$; potentia in hanc massam indefinenter agente $= p$, atque eadem hac, in tempusculo infinite paruo, excitante incrementum celeritatis pariter infinite paruum dc ; esse legem naturæ vniuersalem, vt semper existat $dc = \frac{p dt}{m}$; siue, si pro dt substituaturs æqualis quantitas $\frac{ds}{c}$, vbi per ds spatiolum infinite paruum, percursum in tempusculo dt , intelligitur: esse semper $cdc = \frac{p ds}{m}$.

Si nunc applicare velimus hunc canonem præsentis nostri negotio, statuamus tubulum capillarem AB , in quem assurgat fluidum per A & P ad B vsque, ita vt altitudo capillaris absoluta sit $AB = a$. Quia vero fluidum assurgit motu retardato, vid. *Celeberr. Dom. Muschenbroekii* Dissert. cit. pag. 289, Exper. 17, ponamus scalam celeritatum esse curuam BMD , ita, vt in loco P celeritas guttæ ascendantis exponatur per semiapplicatam PM . Sint ergo $AP = x$, $PM = y$, diameter tubuli $AC = D$. Atque erit primo in P celeritas guttæ ascendantis $= PM = y$; quoniam vero motus retardatur, pro cdc poni debet $-ydy$. Secundo potentiam attrahentem dicamus, vti antea, p ; tertio spatiolum percursum, in tempore infinite paruo, est $Pp = dx$; & quarto massula, quæ a potentia p interea promouetur, est $D^2 dx$. Applicando igitur singula hæc ad præmissum canonem generalem habebimus $-ydy = \frac{p dx}{D^2 dx}$; si vero spectare velimus solas proportionales: orietur, pro æquatione æqualitatis, hæc æquatio proportionis, ob D in eodem tubulo constantem, $-ydy = p$. Suadet autem analogia naturæ, vt pro scala celeritatum BMD assumamus Parabolam Apollonianam, quia eandem in plerisque exemplis sequitur natura. Statuamus ergo $D \cdot BP = PM^2$, hoc est, $D(a-x) = y^2$; atque erit $-ydy = \frac{1}{2} D dx$, & hoc valore substituto, prodit ad nostrum institutum $\frac{1}{2} D dx = p$; vnde patet, potentiam attrahentem in tubulo capillari, siue annulum attrahentem, esse infinite paruum, sed

Fig. III.



Joh. Frid. Ruyff. sc.



sed & simul proportionalem ipsi Ddx, hoc est, peripheriæ supremæ indefinite parvæ annulari; quod omnino poscit sententia *Iurini-ana*. Cum vero dubium oriri hic possit, ascensum aquæ fieri debere in infinitum vsque: quia semper aquæ suspensæ patet novus talis annulus attrahens, quousque patet tubus: respondemus, regulam applicatam non valere nisi de motu retardato vniformiter, quem extinguere aliquando Physice conueniens est; quanquam totum hoc, quicquid adductum hic est, pro tentamine aliquo, non vero pro explorato theoremate & habemus, & damus.

§. XVI. Tandem iucundæ coronidis loco addam hic adiumentum aliquod percommodum instituendi experimenti de coloribus laminarum tenuium, quod non contemnendi vsus erit in Physica experimentalis. Notum enim est huius cultoribus, requiri ad hoc institutum bullas, flatu per fistulam factas, ex aqua sapone incrassata, quæ deinde bullæ, si ad iustam sui diametrum fuerint efflatæ, colores ostendunt pulcherrimos, ceu legere licet in *Grauesandii Physices Elem. Mathem.* edit. 1742, Tomo II, lib. V, cap. 25, pag. 922. Incidi itaque in methodum facilem formandi tales bullas, non fortuitæ, sed desideratæ, cuiusdam magnitudinis. Accipiat tubulus vitreus, qui capillaris adhuc sit, arque ad longitudinem aliquot pedum exporrectus; huius superiori orificio imponatur guttula parua aquæ, per saponem, vti notum est, incrassatæ; tum alterum orificium submergatur infra aquam; quo facto orietur bulla aquea, superiori adhærens orificio, diametri eo maioris, quo magis ær in tubo inclusus per submersionem condensatur atque comprimitur. Constantes sunt hæ bullæ aqueæ; maiores aut minores pro lubitu reddi possunt; & præterea commode conseruari, oculisque exponi. Quæ requisita cum alias admodum difficulter obtineantur in similibus bullis, fortuito oris flatu efformatis: vtilem hanc methodum puto ad instituenda experimenta illa, quæ ab huiusmodi bullis aqueis expectari solent. Concludimus vero cum illo *Horatiano*, Carm. lib. III, Ode XVI, quod in Physicis verissimum est:

-- -- -- Multa petentibus
Desunt multa. Bene est, cui DEVS obtulit
Parca, quod satis est, manu.

